



ՁԵՌԱՄԲ ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՕԾՎԵՑ ԱԿ- ՆԱՂԲՅՈՒՐԻ Ս. ՎԱՐԴԱՆ ԶՈՐԱՎԱՐ ՄԱՏՈՒՌԸ

Դեկտեմբերի 9-ին Ն.Ս.Օ.Տ.Տ. Գաբեգին Բ Ծայրագույն Պատրիարք և Ամենայն Հայոց Կաթողիկոսը մեկնեց Տավուշի մարզի Ակնաղբյուր գյուղ, ուր հանդիսապես տեղի ունեցավ Սուրբ Վարդան Զորավար մատուռի օծման արարողությանը: Եկեղեցին կառուցվել է ԱԺ պատգամավոր Միքայել Վարդանյանի բարերարությամբ:

Դիլիջան քաղաքի մատույցներում Ամենայն Հայոց Հայրապետին դիմավորեցին և դեպի Ակնաղբյուր ուղեկցեցին Գուգարաց թեմի առաջնորդ Ս. Մեպուհ եպիսկոպոս Զուլյանը, Գուգարաց թեմի Տավուշի փոխառաջնորդ Սասուն ծայրագույն վարդապետ Զմրուխտյանը, թեմի եկեղեցականները, Տավուշի մարզպետ Արմեն Ղուլարյանը և մարզային իշխանության այլ ներկայացուցիչներ: Մատուռի օծման արարողությանը մասնակցելու համար Ակնաղբյուր էին ժամանել ՀՀ վարչապետ Սերժ Սարգսյանը և ՀՀ Պաշտպանության նախարար Միքայել Հարությունյանը:

Հոգեպարար շարականների երգեցողության ներքո Նորին Սրբությունը կատարեց մատուռի Ս. Մեղանի օծումը: Վեհափառ Հայրապետն աղոթքով հայցեց Բարձրյալ Տիրոջից անսասան պահել նորած մատուռը, որպեսզի հայորդիները մշտապես արժանանան տերունական օրհնության և հաղորդ դառնան երկնային պարգևների:

Հավարտ արարողության Տավուշի մարզպետը մատուռի առջև ողջունեց Ամենայն Հայոց Կաթողիկոսի և ՀՀ վարչապետի այցը Տավուշի մարզ և Ակնաղբյուր:

Օրը արժանահիշատակ էր նաև այլ իրադարձությամբ: Նորած մատուռի մոտ էին հավաքվել նաև բազում գորակռչիկներ՝ իրենց ուխտը կատարելու Աստծո սուրբ խորանի առջև և ստանալու Վեհափառ Հայրապետի օրհնությունը:

Զորակռչիկներին և ակնաղբյուրցիներին իր օրհնության խոսքն ուղղեց Ն.Ս.Օ.Տ.Տ. Գաբեգին Բ Ամենայն Հայոց Կաթողիկոսը:

«Այսօր մեր հոգին կրկին լցված է բերկրանքով ու ցնծությամբ, և գոհունակության այս զգացումով մենք միասնական աղոթքով կատարեցինք օրհնությունը Սուրբ Վարդանի անունը կրող նորակառույց այս մատուռի: Սրբազան այս մատուռի ուրախությանն այսօր հավելվել է նաև մեկ այլ ուրախություն. հնավանդ մի սովորության վերականգնում՝ զինակռչիկների երդման արարողություն եկեղեցու սուրբ կամարների ներքո, Աստծո ներկայության առջև: Հնամենի սովորություն կոչեցինք, քանզի մեր հայրերը, երբ մեկնում էին Հայրենիքի պաշտպանության առաքելությամբ, համախմբվում էին եկեղեցու կամարների ներքո, իրենց աղոթքն առ Աստված բարձրացնում, Աստծո օգնականությունը հայցում և Աստծուն ապավինած՝ մեկնում ծառայության: Ահա այսօր մենք ուրախությունն ունենք ականատեսը լինելու նման մի արարողության, երբ զորակռչիկ հայորդիները ծառայության մեկնելուց առաջ իրենց երդումը պիտի կատարեն և աղոթքն առ Աստված բարձրացնեն սրբազան այս

մատուռի կամարների ներքո», - ասաց Նորին Սրբությունը՝ իր գնահատանքը բերելով ՀՀ Պաշտպանության նախարարությանը և վստահություն հայտնելով, որ այս նախաձեռնությունը կհաստատվի որպես ընդհանրական կարգ, և ամեն զորակոչիկ, հայոց հնամենի գեղեցիկ սովորույթի համաձայն, իր երդումը կկատարի սուրբ խորանների առջև՝ ներկայությամբ Երկնավոր Տիրոջ:

Նորին Սրբությունն իր գնահատանքը բերեց բարերար Միքայել Վարդանյանին, ում հանձնառությամբ ու նվիրումով իր ավարտին հասցվեց մատուռի կառուցումը: Վեհափառ Հայրապետը ողջունեց նաև ՀՀ վարչապետի ներկայությունը, ինչը նոր քաջալերանք պիտի լինի հայ զորակոչիկներին: Նորին Սրբությունը զորակոչիկներին հորդորեց նաև Հայրենիքին ծառայել այն զիտակցությամբ, որ զինվորական ծառայությունը պարզ զինակրություն չէ, այլ հոգու կերտվածք, սեր ու նվիրում հայրենի սրբություններին, նվիրական արժեքներին, սեր ու նվիրում մեր հողին ու պատմությանը:

Վերջում Վեհափառ Հայրապետը բարի ծառայություն մատուցեց զորակոչիկներին՝ հայցելով Տիրոջ օգնականությունը բոլորին, և կատարեց զորակոչիկների օրհնության կարգ:

Արարողության ավարտին մատուռի բարերար տիար Վարդանյանն իր երախտագիտությունը հայտնեց Վեհափառ Հայրապետին և շնորհավորեց ամենքին մատուռի բացման առիթով: «Մենք մեծ պատվով կատարեցինք այս աշխատանքը և նորից մեր ժողովրդին հույս տվեցինք, որ Վարդանանց ծառն ապրելու է հավերժ, և մեր զինվորները, միշտ այստեղից բանակ գնալով, լինելու են Աստծո Աջի պաշտպանության ներքո», - իր խոսքում նշեց բարերարը:

Ապա Նորին Սրբությունն ու ՀՀ վարչապետը գրուցեցին զորակոչիկների հետ: Ծառայության մեկնող երիտասարդներին Վեհափառ Հայրապետը հանձնեց Նոր Կտակարաններ և խաչեր: Այնուհետև ամենքը ծաղիկներ դրեցին ուխտատեղի դարձած Վարդանի ծառի հարևանությամբ կանգնեցված խաչքարի առջև, ապա ազգային երգերի ներքո Ամենայն Հայոց Կաթողիկոսն ու ՀՀ վարչապետը խաչքարի հարևանությամբ կատարեցին ծառատունկ:

Նորին Սրբությանն ուղեկցում էին Երևանի Ս. Գրիգոր Լուսավորիչ եկեղեցու հոգևոր հովիվ Ս. Անուշավան Եպիսկոպոս Ժամկոչյանը, Մայր Աթոռի փոխդիվանապետ Ս. Մեսրոպ աբեղա Պարսամյանը, Նորին Սրբության գավազանակիր Ս. Հովնան աբեղա Հակոբյանը և Տեղեկատվական համակարգի տնօրեն Ս. Վահրամ քին. Մելիքյանը:

Օծման արարողությանը ներկա էին բարձրաստիճան պաշտոնյաներ, Տավուշի մարզի իշխանությունների ներկայացուցիչներ, Ակնաղբյուրի բնակիչներ:

ՄԱՅՐ ԱԹՈՐ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ